

# Msumbiji yatilia mkazo ulinzi wa mgambo

**MJUMBE** wa Kamati Kuu ya Chama kinachotawala nchini Msumbiji (FRELIMO) Ndugu Oscar Monteiro amesema kuwa Msumbiji sasa inaimarisha zaidi mpango wa ulinzi wa mgambo wa wananchi kujilinda wenyewe ikiwa ni njia mojawapo ya kukabiliana na magaidi wa MNR.

Akizungumza na wanachama wa Chama cha Mshikamano kati ya Tanzania na Msumbiji (Tamofa) mjini Dar es Salaam jana, alisema kuwa katika mapambano kama haya jeshi pekee yake halitoshi, bali vilevile ni kuwaandaa wananchi vijijini katika ulinzi wa mgambo.

Magaidi wanaosaidiwa na utawala wa Makaburu wa Afrika Kusini wanachofanya hivi sasa ni kujaribu kuhujumu uchumi wa nchi ili kurudisha

maendeleo ya nchi nyuma kwa kuharibu shule, hospitali na maeneo mengine ya kuendeleza uchumi, alisema.

Mjumbe huyo wa Kamati Kuu ya Frelimo, pia ni Waziri wa Nchi katika Ofisi ya Waziri Mkuu anayeshughulikia Tawala za Mikoa, alikuwa akielezea hali ilivyo nchini Msumbiji.

Alisema kuwa magaidi hivi sasa wanatumia nguvu kwa kuwalazimisha

wananchi wajiunge nao na wamegundua mbinu mpya ya kuwahadaa watoto wenye umri kati ya miaka tisa na kumi kwa kuwapatia vitu vya kuwafurahisha kama chakula cha kutosha na baadaye kuwalazimisha kufanya mashambulizi.

Ndugu Monteiro, ambaye amekuwa katika ziara ya wiki mbili ya Tanzania alieleza kuwa magaidi wametumia hali ngumu inayoikabili Msumbiji kutokana na ukame ulioikumba kwa muda wa miaka sita sasa kujiimarisha.

Hata hivyo, alisema, njia pekee ya kukabiliana na magaidi ni kuendelea kufanya kazi kwa bidii kwani nia yao ni kutaka kuona uchumi unadidimia kabisa.

Akizungumzia kuhusu Tamofa yenyewe, alisema kuwa itazidi kuimarisha mashikamano uliokuwepo kati ya wananchi wa Tanzania na Msumbiji dhidi ya maadui wa nchi hizi mbili.

Alisema kuwa Tamofa ina jukumu la kuwaelimisha wananchi wa pande zote mbili hali ilivyo nchini Msumbiji.

Naye Mwenyekiti wa Tamofa ambaye ni Waziri wa Nchi katika Ofisi ya Waziri Mkuu, Ndugu Charles Kileo, alisema Tanzania iko tayari kusaidiana na wananchi wa Msumbiji katika kukabiliana na magaidi.

U. 1-3-88  
Na Mwandishi Wetu

Mogambo  
reigns  
role of  
militarists